


E preparacionnan ta den full swing **Calypso y Roadmarch Infantil** **ta conta cu 24 participante**



Durante fin di siman, e comision di Calypso y Roadmarch Infantil, a graba nan jingle pa nan Festival di Roadmarch & Calypso Junior, cu tambe ta priminti di bira uno grandi, cu varios composicion unico. Queen Izy y King Size, e ganadonan di e Festival Roadmarch & Calypso 2013, conhuntamente cu DJ Vibes, a graba e jingle aki.

Tur preparacion ta andando caba y e gran Festival di Roadmarch & Calypso lo tuma luga diasabra dia 18 di januari proximo, den Aruba Entertainment Center na Dakota. E festival lo cuminsa pa 7:00 di anochi, pero e portanan lo ta habri, for di 6:00 di atardi. E interes grandi y e anochi aki ta conta cu 24 participante, cu

lo wordo acompaña pa e banda Exquizit Band. Pues si bo tin bo candidato preferi cu bo kier bay apoya, ya caba bo por cumpra bo carchi, paso nan ta obtenibel na oficina di SAC na Dakota. Tambe tin posibilidad pa cumpra carchi na porta mes riba e anochi ey. E prijs pa carchi ta solamente 5 florin pa mucha y 10 florin pa adulto.



Tanto e miembronan di e comision, como e 24 participantenan ta extende un invitacion cordial pa henter pueblo di Aruba, nan fanaticonan pero specialmente nos muchanan, pa bin presencia y apoya tur e 24 participantenan. E anochi aki ta priminti di bira uno espectacular, yena di ambiente, ritmo y goso di Aruba su gran celebracion Carvavalesco y asina celebra hunto cu nos muchanan nos Carnaval 60 den grandi.

Carnaval di Aruba a nace na aña 1954 caba, como tal e aña aki nos ta celebra 60 aña cu anualmente pueblo ta bini hunto pa mustra nos creatividad, ambiente y folklore manera nos so por. Na aña 1955 varios club

y districtonan a bini hunto pa organisa e carnaval y di eynan a eligi e prome Reina di Carnaval. E parada grandi tradicional a cuminsa desde aña 1957. Pero tabata dia 11 di november 1966 (11-11-66) pa 11:11am cu a funda Stichting Arubaanse Carnaval, SAC. Desde e tempo ey e fundacion, forma pa un grupo grandi di boluntarionan cu hopi entusiasmo, ta traha duro pa organisa e diferente eventonan cu ta atrae un publico grandi di nos mesun ciudadanonan pero tambe turistanan.

Pa mas informacion di SAC y di tur evento di carnaval, subi Facebook, riba e pagina facebook.com/stichtingarubaansecarnaval.